

公文

國務總理唐紹儀因病呈請解職文並 批

爲病難速痊呈請解職調治事竊紹儀因病請假赴津就醫荷蒙 大總統允准在案連日延醫診視舊病轉劇迴思去年疊遭家難閉戶養病久已無志於宦途自分沉埋而沒世嗣奉派充議和代表痛時局之阨危哀民生之蕩析不敢自逸力疾馳驅數月之間寢食失常憂勞過甚精力愈憊猶幸戰禍已息國事聿新冀可葆素休神從容調攝詎意百廢待舉之餘忽受首攬政綱之命自揣病軀敢膺重寄徒以南北初合政府未成勉竭衰庸罔辭勞怨視事以來夜不成寐日必發寒竭蹶以從未敢言疾然而蒲柳之質非可禦疾風驚駘之材不足致千里馴至今日懼膏肓之漸入捐頂踵而何裨惟有懇請 大總統俯鑒愚忱准免國務總理本官迅簡賢能接任以維大局俾獲乞靈藥石退處清閒倘得痼疾之稍瘳長享共和之幸福無任屏營待命之至謹呈

批據呈已悉前因該總理患病特准給假五日派陸徵祥暫行代理方冀早就痊復尅日視事茲據來呈聲稱連日延醫診視舊病漸劇懇請准免國務總理本官各等情披閱之餘曷勝系念該總理於共和宣布以前南北奔馳爲民國効勞甚至及就任總理經營畫錯節盤根困苦艱難非可言喻民國草創正賴長才豈容聽其退休失茲臂助特以情詞懇摯出於至誠不得不諒其苦衷遂厥初服應即准如所請免國務總理本官任爲高級政治顧問仍望趁此寬閑勉自調護以養病之餘暇備政治之諮詢將來倚重正多當有以副國民之望此批

中華民國元年六月二十七日

大總統蓋印 陸徵祥趙秉鈞熊希齡段祺瑞劉冠雄王寵惠蔡元培宋教仁王正廷署名

陸軍部咨各省旗規定陸軍學生成績文

爲通行事從前各省陸軍小學學生升送中學考試程度常患淺深不齊遂致各中學不能一律施教同班異